

LE  
COMTADIN  
PROVENCAL.

*Et le Seigneur a dit : Pour ce qu'ils ont  
delaisſé ma Loy que ie leur ay donnée,  
& n'ont pas eſcouté ma Voix, &  
n'ont pas cheminé en icelle, &c.*

Pourtant le Seigneur des Armées,  
le Dieu d'Iſraël dit cecy. Voicy, ie  
dóneray à ce peuple-cy eau de fiel  
pour boire, ET POVR MANGER  
L'ALVYNE, *Ieremie 9. 5. 13 14. 15.*

*(de Chantreux)*

M. DC. XX.

CASE

F

39

,326

1620C2

THE NEWBERRY  
LIBRARY

## LE COMTADIN

*Prouengal.*

Voyant qu'ordinairement on jette les yeux sur les fauorits des Roys, que tous leurs deportemens passent sous la censure publique, que dans tous les entretiens serieux ou familiers, soit de cabinet ou de table, on y mesle tousiours les mignons des Princes, sur le dos desquels on charge tous les deffaux de l'Estat, que le general & le particulier les accusent comme autheurs de tous les mescōtentemens que le tiers & le quart se fantastiquent: Et que d'autre costé il se remarque que la pluspart les loient & les blasment, non selon la cognoissance certaine qu'ils ont de leurs merites ou imperfections: mais seulement selon qu'ils sont preoccupez par l'affection ou l'enuis qu'o leur porte. J'ay creu pour ce regard qu'il alloit du seruice du Roy & bien du public de donner lumiere à ce petit discours, afin que par iceluy chacun puisse iuger du choix que sa Majesté a fait de la personne de Monsieur de Luynes, & par vne cognoissance parfaite de son naturel & de ses capacitez faire vn iugemēt parfait de ce que l'on doit esperer de sa conduite & de ses actions.

Il n'a jamais esté que les Roys n'ayent pris plaisir d'esleuer par leurs bien-faits quelques confidens seruiteurs, leur grandeur les y obligeant, l'aduancement de leurs affaires le requerrant, & les infirmittez attachées à l'homme les necessitans d'esslire entre vn grand nombre de

domestiques quelque affidé, deuant lequel comme par vn doux soulagement, ils se puissent despouiller de la pesanteur qu'apporte quant & soy vne continuelle grauité de Majesté Royale, afin de goustier par l'interualle d'une heure prise à la desrobée l'agreable liberté d'une vie priuée, & par la communication d'un entretien familier, donner quelque relasche à leurs esprits continuellement agitez par la multitude des affaires partie desquelles ils sont contraincts de confier à la fidelité d'une personne qui les soulage, en les rendans participans de leurs plus secretes pensées. C'est pourquoy il ne s'est iamais veu que les grands n'ayent tousiours eu quelques fauorits : mais il ne s'est point remarqué iusques à present *qu'ils ayent voulu souffrir des compagnons, encore moins des maistres.*

Quoy qu'il en soit on ne donne jamais son cœur à vne personne sans sujet, il faut qu'il y aye vn attrait particulier qui nous incite à cherir ce que nous aymons : Ainsi les Princes par quelque instinct qui les meue, donnent leur affection à ceux le naturel desquels quadre à leur inclination, de là vient qu'ils honorent de leurs faueurs non tous ceux qui les aiment, mais seulement ceux qu'ils cognoissent pouuoir seruir d'instrumens propres à leurs volonte, ou à ceux qu'ils estiment estre doüez de grande valeur & de iugement desquels ils ont receu, où esperent receuoir des signalez seruices, & le plus communément à ceux qui ont quelque gentillesse, à laquelle l'esprit du Prince s'attache par vne rencontre de conformité d'humeur.

De toutes ces sortes de fauorits, nous en



5  
auons des exemples en nos Roys: Charles V.  
surnommé le Sage, comme il estoit Prince de  
grand sens, il n'aima iamais aussi que des serui-  
teurs bien senez: Ainsi il affectionna le Conne-  
stable du Guesclin à cause de ses rares vertus:  
Charles VIII. pour le mesme sujet admist au  
Gouuernement de son Estat Iean Bastard d'Or-  
leans, appelé pour ses merites le bon Comte de  
Dunois, auquel la France demeure encore au-  
iourd'huy redevable pour les cōtinuels seruices  
qu'il a rendu à ceste Couronne durant tout le  
cours de sa vie: Louys XI. a eu pour fauorits  
tous ceux qu'il a iugé luy pouuoir seruir vtile-  
ment en ses affaires, entre lesquels estoit vn  
Tristan l'Ermite: Charles 8. affectionna Brissou-  
net par rencontre d'humeur. En ce mesme tēps  
François Duc de Bretagne se laissoit aussi posse-  
der par vn fin tailleur nommé Landays, auquel  
les grands du pays firent faire le procez: Le Roy  
François I. aimait l'Admiral de Bonniuet pour la  
gentillesse de sa personne: Henry II. esleua Môt-  
morency pour son courage. Charles IX. fit le  
Mareschal de Rets pour la bonne cōduite: Hen-  
ry III. agrandit Monsieur d'Espernon pour son  
esprit. Henry IV. le Duc de Sully comme in-  
strument à ses desseins: Ainsi le Roy a fait choix  
de Monsieur de Luyne pour la confiance qu'il a  
en luy comme en yn autre soy-mesme. Reste  
maintenant à voir s'il merite ou non ceste gran-  
de faueur, & ce que la France doit esperer de la  
conduite de l'estat qu'il a pris en main, & dans  
laquelle il se veut maintenir à quelque prix que  
ce soit en d'espit de tous ses enuieux.

Pendant la grande vogue du feu Mareſchal d'Ancre chacun declamoit contre le bon-heur de ſa fortune, & l'impatience d'une rage publique en faiſoit ſouhaitter le reuers à tous momens : Auſſi ne fut-il pas pluſtoſt ruyné que chacun en applaudit l'action par vne reſiouyſſance generalie. Cet exemple deuoit animer de Luyne à embraller les choſes bonnes, à mieux faire que le deffunct, *puis qu'il n'auoit eſté deffait que pour auoir mal fait.* Mais tout au rebours diſent-ils, de Luyne n'eſt pas ſi-toſt entré en ſa place qu'il a ſuiuy entierement ſa piſte, de ſorte que la meſdiſance s'eſt incontinent jettée ſur luy, le naturel d'un peuple eſtant de detracter touſiours de ceux qui gouuernent l'Eſtat. Et qui ne peut iamais voir de bon œil les fauorits des Princes, pour la croyance qu'il a *que tous ces mignons ſont les vrayes ſenſuës qui toruent en delices le ſang des pauures affligez, & qui s'enrichiſſent de la ſueur de leurs travaux.* Pareil diſcours ſe tient aujour'd'huy du ſieur de Luyne. C'eſt pourquoy il faut examiner ſans paſſion, ſi c'eſt à tort ou avec ſubject qu'on ſe plaint de ſes deportemens.

Pour donc commencer à recueillir ce qui ſe publie de luy dans le monde, ie diray qu'il eſt accuſé publiquement d'eſtre entaché de *Six vices notables*, ſçauoir d'incapacité, de laſcheté, d'ambition furieuſe, d'Auarice inſatiable, d'ingratitude nompareille, & de n'eſtre homme de foy ny de parole : qui ſont toutes qualitez honteuſes, leſquelles ils ſouſtiennent eſtre bien faciles à prouuer contre luy.

1. *Incapacité.* Pour le premier poinct qui regarde ſon Incapacité, on la fonde ſur deux poincts,

en sa naissance & en l'impertinence de son esprit, disans qu'il n'est pas François, qu'il est Comradin subiect du Pape, nay à Mornas petite vilette du Comtat d'Auignon, qu'il y a de tresgrands inconueniens de laisser empieter vne si grande autorité à vn homme estranger, & encores plus de confier la conduitte du Roy & de son Estat à l'insuffisance d'une personne, qui depuis son bas aage iusques à celuy de 40. ans n'a iamais eu l'ame plus releuée que d'occuper son esprit à nourrir des moineaux, denicher des corneilles, siffler des linottes, leurrer des pies grieschcs, voler l'allouette, & pedagogiser des mesquins, qui sont toutes marques certaines de bassesse & de lascheté, avec lesquelles neantmoins il tasche de preoccuper le benin naturel du Roy. Le feu Comte du Lude ayant reproché cent & cent fois aux Luynes lors qu'ils estoient à sa suite, *qu'ils n'estoient bons qu'à desnichcr des Gays verde.* C'estoient ses mots : Et cependant tout en vn coup, comme si le S. Esprit estoit descendu dessus eux, ainsi que iadis sur les Apostres, ils ont eu l'audace d'arracher le timon de l'Estat aux anciens Officiers de la Couronne, pour de haute lutte en prendre l'absolu gouuernement.

Les autres qui sont plus contemplatifs, disent qu'il n'y a rien qui rualle tant la dignité Royale, ny de si honteux à la renommée de la nation Françoisse, que de permettre qu'un petit fauconnier qui depuis son hors de page iusques au 24. Auiil 1617. n'auoit gouuerné autre chose que des Espreuiers, & le lendemain 25. sans autre experience que de son audace luy voir prédre la pos-



fession du regime de ceste Monarchie, qui dès  
 le commencement a fait mille impertinences  
 dans l'Estat pour faciliter l'establissement de sa  
 future grandeur, ayant seul resolu la continua-  
 tion de la detentiõ d'un premier Prince du sang,  
 arresté l'esloignement de la Rõyne-mere hors  
 de Paris avec la relation au Chasteau de Blois,  
 osté à ceste Princeesse l'education de ses enfans,  
 empesché le retour de Monsieur de Bouillon en  
 Cour, de crainte que la grande experience de ce  
 sage Seigneur ne secondast la generosité de l'es-  
 prit du Roy, ne pressast la deliurance de Mon-  
 sieur le Prince, & ne controollast Luyne en son  
 ignorance, qui a par des procedures extraordi-  
 naires violenté la Iustice du Parlement en l'ou-  
 uerture du College des Iesuites à Paris. A fait des  
 retranchemens de la gendarmerie, le departe-  
 ment des garnisons aux frontieres, introduir les  
 achapts honteux des places & gouuernemens, a  
 ordonné absolument du maniemment des finan-  
 ces, disposé des Ambassades, donné audience  
 publique aux Ambassadeurs sans rougir de son  
 impertinence dans la negociation des affaires  
 estrangeres, qui a mis ce Roy & la France en  
 mes intelligence avec tous les anciens alliez &  
 voisins de ceste Couronne, qui enleué à l'im-  
 prouiste le Roy hors de Paris durant la rigueur  
 d'un froid violent, & mesme en vn temps de  
 Carême-prenât, auquel les Roys ont tousiours  
 accoustumé d'honorer ceste ville de leurs pre-  
 sences, & de s'en approcher lors qu'ils en sont  
 esloignez. Luyne au rebouts l'a mené en Picar-  
 die où il auoit enuie d'aller s'establir en son  
 gouuer-



gouuernement, & y faire son entrée, ainsi qu'il fist le iour des Cendres: ayant vn ptemier Prince du sang, & le Comte de Vaudemont à la suite; Qui a mené le Roy en son liēt de Iustice sans en aduertir au preallable son Parlement, ayāt procuré par ceste mauuaise procedure le peu de contentement que S. M. y receut en la verifiction des Edicts, qui enuoye faire des plaintes à Monsieur le Nonce par vn Cheualier du Guet, qui par le mesme personnage a fait porter parole à M. le Comte de Soissons, qu'il auoit aggreable la recherche que ce Prince desire faire de Madame de France, qui a mis en desordre par son impertinence, & renuersé par son ambition toute l'institution de l'Ordre des Cheualiers du S. Esprit, qui fist partir le Roy de Fontaine-bleau pour aller à Orléans par des resolutions precipitées, & tout cela à la barbe des Princes & vieux Officiers de la Courōne, sans qu'on aye demandé leur aduis. Partant qu'il faut aduoüer, disent-ils, ou qu'il y aye vne grande stupidité parmy les grands, ou vne extreme effronterie audit sieur de Luynes, & de là ils concluent qu'un homme estranger comme luy, non subiet du Roy, inexperienced aux affaires, qui gouuerone tout à sa poste, & ce qui est plus à noter, *qui reduit tout le seruice du Roy, & le bien de l'Estat, au point de ses interests particuliers*: Qu'il faut que de necessité son apprentissage couste bien cher à S. M. & à la France, les fautes qu'il commet tous les iours ne pouuans produire que la ruine ineuitable de ce Royaume: Voila les discours communs qui se tiennent dans le public, voyons au reste

Ils disent en apres qu'il n'y a rié de plus lasche que luy, & que la crainte continuelle dont il accompagne sa vie, est vne preuve indubitable de la bassesse de son ame, & de ses mauuais deportemens: Qui fait mal craint tout, & qui a enuie de bien faire ne redoute rien; C'est pourquoy les cœurs genereux qui ont la conscience nette, les mains innocentes, les pēsées droites, & les procedures irreprochables, ayment mieux mourir dans la liberté d'une frequentation publique, que de viure renfermez par l'apprehension du iuste chastiment deu aux malefices: Ainsi voit-on que les hōmes qui ont fait quelque action par vn esguillon vrayement genereux, se plaisent ordinaiemēt à se monstrier en public. Ainsi le Marechal de Vitry apres auoir heureusement executé le cōmandement du Roy, en la personne du Marechal d'Ancre, estoit bien aise de se monstrier aux Parisiēs, & le peuple bien aise de le voir, par ce qu'il auoit esté instrument d'une action signalée qui redōdoit au contentement du general. Monsieur de Luyne deuoit faire de melme: Mais au rebours, dès la mort de cēt hōme, il a vescu plus qu'il n'auoit iamais fait en defiance continuelle, sa timidité, ou les mauuais desseins qu'il a, l'ayans rendu captif dās le Louure, n'osant visiter personne, & redoutant tout le monde. D'où procede cela, disent-ils, sinon que ce n'a pas esté la generosité de mieux faire que le Marechal d'Ancre, qui l'a porte à conspirer contre luy, mais seulement vne pure necessité de sauuer sa fortune: Du Agen luy ayant donné aduis qu'il y auoit resolution prise de le ruiner dans le iour de S. Marc: De sorte que nō le bien de l'Estat, ny le service du Roy le feist

*entreprendre l'execution de ceste coniuuration, mais son salut particulier: L'aduertissement de du Agen ayant en plus de force enuers Luyne que toutes les exhortatiōs que plusieurs bons Frāçois luy auoyēt fait pendant huiēt mois qu'on le pressoit de preuenir la desolation de l'Estat, dōt il n'auoit soin, ainsi qu'il a faiēt clairemēt voir, ce disent-ils, par les actions qu'il a commises depuis; Estant tres-veritable que le procedé qui a esté tenu a la mort du Marechal d'Ancre, demōstre qu'il a esté precipité & non meurement cōsidéré; Car vne personne genereuse qui n'eust esté portée en ceste action que du seul desir de sauuer l'honneur de la Frāce, eust estabuy vn ordre bien plus honorable en l'executiō. Il n'eust iamais esté d'auis qu'un homme de peu, eust ceste gloire de finir ses iours comme vn Cesar, par les mains des braues Cheualiers, & souillé de son sang les murailles du Louure à la face d vn Roy: Il le falloit liures à la Iustice, & par vn supplice signalé le faire seruir d'exemple aux fauorits de ne plus abuser de la bonté & autorité de leurs maistres, qui estoit l'opinion de tous les principaux de l'entreprise, hormis de Luyne, qui ne se soucioit pas cōme l'affaire passast, pour ueu qu'elle s'executast, & asseurast sa personne, qui est vne marque de lascheté insigne, qui a tousiours accompagné toutes les actions de sa vie, ayant esté trouué plusieurs fois pleurant comme vn enfant du temps qu'il estoit en vne apprehension continuelle que le Marechal d'Ancre ne le renuoyast cueillir des figues en Prouence.*

*Le soir de la mort dudit Marechal, le Roy redit vn tesmoignage de ce que dessus, & confessa*



la lascheté naturelle de Luyne, car ainsi que l'on entretenoit S. M. à son coucher du contétement que tout le peuple auoit de la fin de ce miserable, le discours agreant au Roy, la ioye luy fit prononcer ces parolles, *Il n'a pas tenu à moy que cela n'a esté executé plus tost, mais Luyne ne s'y pouuoit iamais resoudre tant il est poltron*: Ce sont les propres mots que le Roy a rendu pour preuue de la generosité de Luyne.

Ce qui est confirmé d'auantage par la depouille qu'il a voulu auoir (*Comme vn second Maistre Jean Guillaume.*) d'une personne qu'il auoit faict tuer & duquel apres sa mort, il n'a pas en honte de porter les manteaux, robes de chambre escharpes, aigrettes, cordons, & autres ioyaux, qui est vne marque au dela de toute lascheté.

Voicy vne autre furieuse batterie, d'ot on se targue encore contre luy, ils disent que c'est vn ingrat ingratissime dont le Roy meismé en ressentira les effects: Luyne estant d'un naturel, *qu'il n'ayme que luy-mesmes, n'affectionnant S. M. qu'en tant qu'il estime se pouuoir garandir par ceste voye, n'ayant autre objet que l'establissement de sa fortune, & d'auoir à contre-cœur ceux auxquels il a des estroites obligations*: En preuue dequoy ils alleguent pour exemple Monsieur le Grand, auquel il doit sa premiere nourriture, ayant esté esleué pendant sa ieunesse pres ledit Seigneur: Neantmoins au lieu de reconnoistre l'honneur qu'il a recen en ceste maison, ç'a esté le premier qu'il a attaqué si tost qu'il est entré en faueur, ayant voulu faire perdre audit Sieur le Grand, & prendre pour luy le Gouvernement de Bourgogne, avec l'Estat de Grand



Eſcuyer, pour en reparer la mouſtache de Cadetnet, le tout au preiudice du Marquis de Termes: Ainſi au lieu d'eſperer toute aſſiſtance pres de S. M. par l'entremiſe d'une perſonne qu'ils auoient nourry, ils s'y ſont veus trauerſez par Luyne qui deuoroit la deſpoüille dudit Sieur le Grand, ſur l'opinion peu charitable qu'il ne releueroit de la maladie, dont il eſtoit lors allecté, qui eſt vne ingratitude nompareille, & vn ſeruiteur de mauuais naturel, de vouloir empescher que le Roy ne gratifiast ledit Sieur de Termes des charges de ſon frere apres de ſi lōgs ſeruices qu'ils ont rendus aux feus Roys, & à S. M. regnante.

En ſuite ils mettent en auant Monſieur de Carcaſſonne, lequel a autresfois grandement aſſiſté le pere de Luyne en pluſieurs de ſes neceſſitez, & continué les meſmes plaiſirs enuers ſes enfans, ayant contribué en tout ce qui luy a eſté poſſible pour ayder à les maintenir dans le monde, les ayants ſouuent recommandez au feu Roy, & aux amis qu'il auoit en Cour: De ſorte que tous les trois freres n'oſeroient deſnier qu'ils n'ayent de tres-particulieres obligations audit Sieur Eueſque: Mais cela n'a pas empesché que ils ne l'ayent trompé auſſi bien que les autres, l'ayant retenu vn long temps en Cour, & puis renuoyé en Languedoc, fait reuenir à Paris pour l'entremiſe de leurs affaires, le tout ſous belles promeſſes, dont il n'eſt reüſſi que le vent de leurs trompeuſes paroles, dignes de leur ingratitude, de laquelle ils recompentent tous ceux qui s'employent pour eux, leur ſemblant que c'eſt aſſez de paroître courtois de diſcours, & d'ac-

*compagner d'un simulé soub-ris leurs véritables tromperies.* Ils ont payé de mesme monnoye le Marechal de Souuré, quoy que l'un des principaux appuys de leur establissement aupres du Roy, lors qu'il estoit Dauphin, ayant procuré pensio pour luy & pour ses freres; Et en recompense Luyne fait tous ses secrets efforts, pensant esloigner ledit Sieur Marechal des bonnes graces du Roy & de la Cour, dont il fut venu à bout sans le bõ naturel de S. M. qui n'a peu oublier les services de ce bon Seigneur, ny l'amitié qu'il porte à M. de Courteuault, & au petit Chevalier son frere.

Voyons en apres, disent-ils, en quelle monnoye il a payé tous ceux qui l'ont assisté au dessein contre le Marechal d'Ancre, la dessus ils commenceront par du Travail qui avoit le plus travaillé, voire esté le principal auteur de l'entreprise. Neantmoins Luyne l'a fait mourir sur une rouë sous pretexte d'une proposition secrette que du Travail avoit communiqué audit Luyne, tendant à inciter le peuple à faire quelque tumulte contre la Royne mere lors qu'elle sortiroit de Paris, dessein à la verité tres-abominable. Mais qui ne se pouvoit executer sans le consentement dudit Luyne, lequel en pouvoit aisément divertir du Travail, au cas qu'il eust eu intention de ne perdre son amy: Tout au contraire disent ils, Luyne fut bien-aysé de se servir de ce pretexte pour ruiner du Travail, duquel il se vouloit defaire, Car le vray sujet de la perte ne vient point de ladite proposition. Ains de ce que Luyne luy avoit promis quelque benefice de la des-

poüille du Marechal d'Ancre. Et Trauail ayant descouuert que Luyne se moquoit de luy, *il iura de le poignarder*, Luyne qui craignoit Trauail pour le cognoistre homme d'execution, resolut de le preuenir en l'accusant de ladite proposition, ayât mesme *seruy de tesmoin contre luy* pour cét effect. Ainsi se sauua Luyne de la main du Trauail. Ainsi du Trauail a esté payé par l'ingratitude de Luyne. Que cela ne soit tres-veritable, disent-ils, que on voye en suite de quelle façon il a traisté le Marechal de Vitry, il n'a cessé qu'il n'ait mis le Roy en soupçon de sa fidelité, heurté furieusement son honneur, sa fortune, & celle de ses parens, quoy que tres-braues Caualliers, entre lesquels est l'irreprochable du Halier. non pour autre dessein que pour posseder seul la pers. ne du premier Prince du sang, afin que *sa detention ou sa deliurance dependist de sa volonté absolue*; pour à quoy paruenir Luyne n'a pas craint d'offencer les innocents, & de terrasser ceux ausquels il auoit le plus d'obligation, *proferant l'establissement de sa fortune, à la ruine de ses meilleurs amis*: Le mesme a-il fait au Comte de la Rocheguyon, qui a procuré tant qu'il a peu l'aduancement dudit Luyne, jusques à se rendre sollicitateur de son mariage avec la fille de Monsieur de Montbazon, & Luyne a fait ce qu'il a peu pour diuerrir le Roy del'inclination qu'il a d'aimer ledit sieur Comte: Et si du Agen n'eüst fait sa main de bonne heure, il ressentiroit à present combien Luyne a cointe memoire des plaisirs & seruices qu'on luy rend. Le President Cheualier en scait aussi quelque chose, & le bon homme Cotignon qui a seruy



Luyne fidelemēt, mesme en vn temps espineux, auquel il auoit peu de gens en qui se fier. Les Sieurs de Guichaumont qui fut le premier qui porta le pistolet dans la teste de Cōchine, Sarroque, la Chesnaye, & autres qui estoient de l'entreprise, n'ont este mieux recogneus. Combien ont-ils abusé de la bonté de Madame la Comtesse de Soissons, qui a employé son credit pour maintenir Luyne & ses freres, iusques à espouser leurs passions? Qu'ont ils fait pour elle en recompense de tant de plaisirs? rien autre chose, sinon qu'ils l'ont trompée, & pour comble ils ont trauaillé à mettre la diuision entre les deux maisons de Bourbon, afin d'empierter plus facilement toute l'autorité de l'Estat par le moyen de ceste des-vnion. Pareil traictement ont-il fait à Monsieur de Longueuille apres auoir accommodé Luyne du Gouuernement de Picardie. La faueur s'est mocquée de luy, g'orieuse d'auoir emporté ce que le Marechal d'Ancre n'auoit sçeu obtenir.

Qui a-il de comparable à leur ingratitude enuers le Roy? *s'ils affectionnoient autant S. M. comme S. M. les affectionne, ils viuroient tout autrement qu'ils ne font*: Mais ils se rendent indignes par leurs procedures de l'amitié d'un si grand Prince, & des biens & honneurs qu'ils en reçoient. Car au lieu de veillier à ce qui est du seruice de S. M. & à le rendre intelligent de ce qui se passe en son Royaume, *que ne font-ils pas pour luy faire perdre la cognoissance de ses affaires?* Quels efforts ne font ils pas pour diuertir s'ils pouuoient la generosité de son courage par des amusemens dignes de  
Luyne



Luyne, & non d'un Roy de France. Quels astucieux n'employent-ils pas que le Roy ne face bon accueil qu'à ceux qu'il leur plaît, & faire oublier à S. M. tous les vieux seruiteurs de son pere, pour en aymer de nouveaux creatures de Luyne? Que n'inuentent-ils pas pour mettre l'esprit du Roy en defiance de la Royne sa mere, de Monsieur son frere, & de tous les Grands qui n'adherent à leurs volontez? Que s'il y a crime punissable, c'est cestuy-là, vouloir assieger l'esprit du Prince pour aliener les tendres mouuemens de son naturel; C'est vne ingratitude sceleratissime. Or que Luyne face toutes ces pratiques, afin d'esloigner tout le monde, & posseder seul le gouuernement, c'est chose plus claire que le iour, & vn crime plus noir que l'enfer, qui produira mille monstres dans l'enfer, qui produira mille monstres dans l'Estat, si on laisse plus longuement impunies telles énormes meschancetez.

N'est-ce pas aussi vne ingratitude nonpareille, de laquelle ils ont usé enuers Monsieur du Mayne, lequel apres les auoir accommodé de ses places, & assisté franchement aux mouuemens derniers, pour recompense ils le font esforcez de luy faire confiner ses iours en vne prison, voire de le faire tuer sous pretexte de resistance?

En apres, qu'est-ce qui ne se dit pas pour depeindre son auarice? Le bruit commun estant par tout que Luyne a commencé son entrée en la maison du Roy, ainsi que Iudas en la compagnie des Apostres: Si tost qu'il s'est veu auoir quelque part aux bonnes graces de S. M. la pre-

miere chose à quoy il a butté, ç'a esté d'attraper la bourse; & de fait il n'eut pas de repos, iusques à ce que par ses pratiques, il eust osté à Monsieur le Marechal de Souuré le maniement des menus plaisirs du Roy qu'il prist pour luy, puis l'a transferé à ses freres, qui ont si bien fait valloir ceste charge, que là où elle ne montoit qu'à cinq cents escus par mois du temps dudit Sieur Marechal, elle va aujourd'huy à des millions de liures. Il se dit aussi publiquement qu'il n'a procuré la mort de Conchine que pour sa despoüille, Luyne n'ayant peu cacher en cela l'auuidité de son auarice, en ce que s'estant veu frustré de l'esperance d'auoir les biens de la Marechale d'Ancre (l'Arrest interuenu contre elle portant reuinion d'iceux à la Couronne) Luyne n'a pas eu honte de violenter la Iustice, & par vn don qu'il en a extorqué du Roy a destaché du Domaine de S. M. vne chose qui auoit esté reünie aux lys *pour marque des abus d'une insolente faueur*, à laquelle Luyne a succédé en toutes façons. Il ne s'est non plus contenté d'auoir rauy ceste grande despoüille. Il a esté si lasche, disent-ils, que d'auoir fait jetter des excommunications par toutes les Eglises de Paris, *afin d'auoir reuelation des biens qui pouuoient estre recelez lors du sac de la maison de Conchine*, desquels le deffunct par prudence n'auoit voulu faire faire aucune recherche, là où Luyne par bassesse d'ame n'a point eu de honte de souïller son honneur afin d'assouuir l'insatiabilité de son auarice.

Il a bien fait pis, disent-ils: C'est qu'il a raisonné tous les creanciers du feu Marechal d'Ancre

avec lesquels il y a composé, ayant fait perdre a chacun d'iceux le tiers & la moitié de leur den. Sa vilannie à encore passé plus outre. C'est qu'après s'estre fait donner par le Roy la maison du faux-bourg S. Germain, & ayant fait mettre au dessus de la porte, l'Hostel de Luyne, & voyant que le peuple s'en mocquoit, il le fit aussi-tost destiner pour loger les Ambassadeurs extraordinaires: Et pour cét effet a reuendu ladite maison au Roy quarante mil escus, espuisant ainsi, & tirant argent de toutes mains des coffres de S. M. Mais tout cela n'est rien au prix de ce qu'il a fait durant trois ans qu'il dispose des deniers de l'Espagne aussi absolument que du reuenu de la mestairie de Luyne, de la Fontaine de Cadnet, & des Bruyeres de Brante, ayant espuisé vn nombre infiny d'argent en l'achapt des charges & Gouuernemens qu'ils possèdent, & pensions qu'il fait ordonner à cent ou six vingts gueusailles de sa lignée: De sorte que les gratifications que le Roy auoit accoustumé de donner à ses vieux seruiteurs, ne s'estendent pour le iourd'huy que sur ceste parentaille, qui comme chenille rongent les fleurs de Lys, & deuorent la substance deuë aux autres, pour s'enrichir promptement aux despens du tiers & du quart. Toutes les pensions des Grands & vieux Officiers de la Couronne estans retranchées, ou demeureront arrierées, afin de faciliter le payement de celles de leurs supposts. Ainsi Luyne a fait enleuer en vn iour quatre cents mille liures dans l'Espagne pour marier sa niece Combalet, & il ne si peut trouuer cent escus pour les appointemens de la



Royne mere : La maison du Roy , de la Roÿne & de Monsieur , sont arriere pour illustrer celle de la parenté Luynistre , *Le Roy n'a plus vn sols , & Luÿne a dix ou douze millions dans les Citadelles d'Amiens, Calais, & la Fere : le Roy vend son Domaine pour subuenir à la necessite de ses affaires , & Luÿne l'achete sous noms interposez pour s'aggrandir aux despens de la Couronne.*

Cadnet a pris vn million de liures sur le sel pour son mariage : il s'est fait adiuger dix huit mil liures de rente sur les Greffes des greniers à sel de Paris : il en a deux fois autant sur les Greffes de la Picardie , & cela sans bourse deslier, Branche a compté six cents mille escus par son contract de mariage , la grande familiarité que ces trois freres ont avec ce preud'homme Moisset , ne prouenent que des estroictes intelligences qu'ils ont ensemble pour voller les deniers du Royaume : Ainsi voit-on que Chalange & autres tels partisans ont plus d'accès aux fauorits que les grands , & les vieux Conseillers de l'Estat ; Tant d'Edicts nouueaux qui ne seruent que pour affliger le pauvre peuple , ne sont inuentez que pour assouuir leur auarice , Encore cela ne suffit-il pas. Ils ont fait augmèter les tailles de *Quatre millions deux cents soixante mil liures de puis trois ans en ça* : Il ne se passe affaire dont ils ne tirent la quinte-essence : On a veu Monsigot tenir banque dans le Louure pour la composition des pensions. N'est-ce pas chose estrange que ce Secretaire qui n'auoit pas le liard à la mort du Marechal d'Ancre, soit à present riche de cēt cinquante mil escus , & le gros Modene de trois



cents mille? De là on peut iuger la richesse du maistre puis les valets en si peu de temps attrapent, ce que les plus vieux Officiers n'oseroient esperer de gagner en leur vie: Et ce qui est de pis en l'avarice de Luyne, c'est qu'elle n'a point de reflux, tout ce qui tombe en ses coffres, tombe en main-morte, il est logé, nourry, deffrayé, entretenu luy, ses freres, & tous les leurs aux despens du Roy & du pauvre peuple.

5. *Ambition.* Leur Ambition n'est pas moins monstrueuse que leur Avarice, *comme ils desirent auoir tant, ils veulent aussi commander à tous.* Qui considerera meurement leurs procedures, trouuera que les fondemens qu'ils jettent de leur grandeur sappe toutes les autres, voire celles du Roy, ny ayant aujourd'huy puissance dās le Royaume qu'ils ne tiennent assiegée. Il semble qu'il ayent resolu d'establir leur pouoir par dessus tout le reste de la France. Le Roy, la Royne, la Royne-mere, Monsieur frere du Roy, Madame de France, Monsieur le Prince, tout cela est comme enucloppé dans les enceints de leur cabale: On ne peut aborder S. M. que par leur entremise. Ils ont préueu à ce que nul ne le puisse entretenir qu'avec leur consentement: Ayant contrainct le sieur de la Curée de se deffaire de la Lieutenance de la cōpagnie de cheuaux legers pour la remettre à Branthe, afin que l'on puisse aussi peu aborder le Roy aux champs, que dedās le Louure. Ils ont fait tout ce qu'ils ont peu pour essloigner des bonnes graces du Roy Monsieur le Cheualier de Vendosme. Ils ont debuté de la Cour monsieur de Montpouillan, Madame la nourrice du Roy,

& infinies autres, auquel S. M. auoit quelque creance. Ils ont changé tous les vieux seruiteurs du feu Roy, pour engliffer de nouueaux de leurs factions. Aurant en ont il fait à l'endroit de la Royne, auprès de laquelle ils ont introduit toute leur parenté, ayant esté effrontez que de mettre pour Dame d'atour de la Royne leur sœur Vernet qui a seruy Madame de Paulian de fille de chambre, d'où elle fut chassée pour sa vie scandaleuse, & à laquelle Vernet emprunta vn pain sur la fournee auant l'espouser, ledit Vernet estant lors Violon, mōstrant à danser aux pages de Mōsieur de Montmorency au Languedoc, & maintenāt gouuerneur de Calais, qui a eu l'honneur de succeder à vn Marechal de France, & en la garde d'vn premier Prince du sang. L'orgueil a encore porté Luyne iusques là que de faire eriger vne charge nouuelle de surintendante de la maison de la Royne pour sa femme, afin de faire sortir du Louure Madame la Connestable qui est vne sage Dame, d'aage meur respectueuse, bien sensée, & de qualiré plus releuée que la femme de Luyne, qui est d'vn esprit esceruelé, qui n'a que dix-neuf ans, laquelle son mary baille vne gouuernante pour la conduire, & cependant il veut que la maison de la Royne passe sous sa disposition le desir de regner les ayant tant esbloüis que de passer par dessus tout respect, pour assouuir leur ambition. Tout ce qui est autour de mōsieur frere du Roy, ne sont que les creatures de Luyne: Tous les espions qu'à la Royne-mere, ne sont qu'emissaires de Luyne. Il n'a donné liberté à Mōsieur le Prince qu'a condition qu'il

playeroit à toutes ses volontez: N'a-il pas esté si  
 auueglé que d'accepter l'honneur que ce Prince  
 luy a fait d'estre parrain de sa fille aînée? Et pour  
 tout cela, ce Prince n'en est pas en plus grand  
 credit près de luy: Et de fait, on a remarqué qu'il  
 est tous les iours teste nuë en la chābre de Luy-  
 ne, pendant qu'il donne des audiences la teste  
 couuerte, meisme on luy refuse quelquesfois la  
 porte de sa chābre, & au Duc de Guise aussi, quoy  
 qu'yssu de pere qui n'eust iamais peu souffrir tel  
 escorne. La gloire de Luyne a passé bien plus  
 outre. C'est qu'on la veu plusieurs fois couuert en la  
*chambre du Roy S. M. estant nuë teste.* Que peut-on  
 adiouster dauantage à cela, sinō qu'on remarque  
 encore qu'il enuoye ordinairement Desplan &  
 autres dire au Roy qu'il supplie S. M. de le venir  
 trouuer en sa chambre. Le 19. May vn grand de  
 ce Royaume entendit vn nommé Ville-longue  
 Fauconier qui vint dire au Roy, de la part de Luy-  
 ne ces propres mots, *Sire, Monsieur de Luyne vous*  
*supplie de prendre la peine de venir iusques en sa cham-*  
*bre, qui est vne outrecuidance nompareille, la-*  
*quelle neātmoins il pratique effrōtement tous*  
*les iours, Le Roy va plus souuent au departement de*  
*Luyne, que Luyne à celui du Roy.* Par là peut-on voir  
 quel est son orgueil, & combien il est dangereux  
 de commettre la puissance souueraine entre les  
 mains des gens ambitieux, puis que le desir de re-  
 gner viole tout respect. Mais ce qui passe au delà de  
 l'insolence, c'est la resolution qu'il a pris sur le  
 faict de la fortification d'Amiens, luy estant re-  
 presenté que ce traual seroit long & de grand  
 coust. Il dit, *ie veux à quelque prix que ce soit que cet*



*ouurage soit acheué dans vn an : Paroles vrayement insolentes, & qui demonstrent le dessein de la tyrannie : Je veux. Marque vne auctorité Royale, & à quelque prix que ce soit, tesmoigne le desir violent qu'il a de s'establir & de regner. Ne fait-il pas bien cognoistre encore sa forte vanité, quand pour preuue de son amitié, il tutaye la Noblesse, mesme des Cheualiers qui sont plus âgez, & cent fois de meilleures maisons que luy, auxquels il parle par toy, pensant les bien tauoriser : estimant obliger les Grands quand il leur donne en passant vn regard du coin de l'œil avec le petit sous-ris; En quoy Cadnet excelle par dessus les autres. On ne doit passer sous silence l'orgueilleuse Rodomontade de Brantche, qui s'est eschappé de dire à vn de ses confidens, *Je sçay bien que nous auons des ennemis, il n'y a remede, nous ne les cringnons pas: Car le Roy nous a promis de perir avec nous: Et Luyne a dit à vn autre, Il y a des desseins sur ma vie, mais ils ne se peuuent executer que mon sang ne rejalisse sur la face du Roy.* Qui pesera ces paroles, il trouuera qu'el es sont plaines d'impieté: Car qui a-il de plus abominable que de se vanter d'auoir engagé le Roy à perir pour maintenir l'orgueil de leur fortune? N'est-ce pas aussi vne outrecuidance nompareille à Luyne d'auoir osé changer à la terre de Maillé le nom ancien de cette maison pour luy donner le sien? que pourroit faire d'auantage vn conquerant que d'imposer des nouueaux noms aux villes de ses conquestes? Or que ces trois freres ne soient superbes au supreme degré, il ne faut que repasser par la memoire l'audace de Luyne, qu'vn mois apres la mort de Conchine*



Conchine, demanda en mariage Madamoiselle de Vandoisme: la presumption de Cadnet n'est moins galante en la recherche qu'il fit en l'an 1618. de Madame la Princesse d'Orange sœur d'un Prince du sang, & veufue d'un Prince souverain: Cadnet, dit je, auquel la Nourrisse du Roy n'a voulu donner sa fille en mariage, & que la veufue de Criton Professeur en la langue Grecque à Paris a refusé d'espouser, & quelque temps apres le voila qui aspire à l'alliance du sang Royal qui est vne effronterie monstrueuse, qui tesmoigne ouuertement l'excez de leur outrecuidace! Branthen'a il pas commis vn rapt en la personne de Madamoiselle de Luxembourg, à laquelle ils ont donné des gardes qui l'accompagnoient par tout, mesme dedans le Louure, de crainte qu'elle ne leur eschapast, ayant voulu à quelque prix que ce fust, emporter de haute lutte vne Princesse de la plus Illustre maison de France, nonobstant la plainte des parens, & l'opposition de Monsieur de Bouillon. C'est pourquoy ce petit glorieux n'a pas encores mis le tableau de ses armoiries parmy celles des Cheualliers qui sont dans l'Eglise des Augustins de Paris, afin de le remplir de quelque qualité Ducalé, estimant que ce seroit repugner à la grandeur de sa maison de ne porter que le tiltre de Lieutenant de la Compagnie des chevaux legers du Roy. Ha! pauvre Estat de France, disent-ils, qu'il fait dangereux de nourrir tels auortons, *qui s'estiment meriter toutes choses, & toutes choses indignes de leurs merites.* Qu'il ne soit vray, de qu'elle façon Luyne traite-il le Duc de Môtbazon son beau-pere, qui est

Issu de l'une des plus illustres races de Bretagne. Et cependant on le voit tous les iours en l'antichambre de Luyne picquet le coffre comme vn autre suiuant : On dira qu'il y a bien des Princes qui en font autant, en quoy il se peut dire aussi *qu'ils ne sont point genereux de le faire, ny Luyne sage de le permettre.* Quoy plus? Luyne n'a il pas esté si temeraire que d'auoir donné charge au Colonel d'Ornano de s'emparer de la Principauté d'Orange apres le deceds du feu Prince, & voyant qu'il auoit failly à surprendre la ville, n'a-il pas esté si outrecuidé que d'enuoyer Marillac en Hollande pour sonder le Comte Maurice s'il s'en voudroit pas deffaire, sans considerer qu'il offenceroit par ceste recherche vn des plus grands Capitaines de l'Europe, & vn des plus affectionnez seruiteurs de ceste Couronne.

La derniere charge qu'on jette sur le dos de Luyne. C'est qu'on le taxe d'estre ny homme de foy, ny de parole, faisant profession *de tout promettre pour complaisance, & de ne rien accomplir par meschanceté*, qui est le plus grand vice, dont puisse estre entaché vne personne qui manie les affaires publiques, d'autât que la foy est le lien de la societé humaine, & où ce ressort mïque, toute perfidie regne. C'est ce qui fait qu'on oyt dans la Cour : & par toute la Frâce tant de plainte contre Luyne, mil & mil personnes l'accusants d'auoir esté trompez pour auoir trop creu en ses promesses qu'ils appellent *planches pourries*, auxquelles il n'y a nulle confiance, soustenant que si Luyne pipe bien, Cadnet trompe encores mieux. De sorte que de cent qui ont affaire à

eux, les quatre-vingts dix-neuf rendrōt tefmoignage que ce ne font que vrais vendeurs de Galimatias, qui ont fait banqueroutte à toute fidelité, & fans s'arrefter à vn nombre infiny de Noblesse qu'ils ont abusé. Voyons, disent-ils, comment ils ont vescu avec les Grands, & mêmes avec leurs meilleurs amis. N'ont-ils pas manqué de parole à tout ce qu'ils ont escrit & promis à la Royne-mere, au Prince de Piedmond, à Madame la Comtesse de Soissons, au Duc de Guise, de Montmorency, de la Force, à Monsieur de Mayenne, au Marechal de Bouillon, de Brissac, & autres? Qu'ōt-ils tenu de tout ce qu'ils auoient promis aux Catholiques & aux Huguenots? N'ont-ils pas trompé furieusement leur premier maistre le Comte du Lude, auquel Luyne auoit donné la foy qu'il ne procureroit iamais d'estre Duc & Pair, que ledit Comte ne le feust aussi? Et cepédant Luyne s'est fait promouuoir à ce grade sans en donner aduis audit Comte, lequel eut vn tel despit en l'ame d'estre ainsi laschement pippé, qu'il en est mort de regret: Et Luyne voyant que Lude auoit pris cet affaire si à cœur que d'en estre tombé malade, il luy escriuit pour le consoler, l'asseurant qu'il feroit eriger Lude en Duché: Le Comte apres auoir leu ceste lettre, la fit ietter au feu, & dist au Gentilhomme qui l'auoit apportée que son mal auoit prins son cours, & qu'il estoit trop tard pour y dōner le remede, ainsi mourut deux iours apres. A combien de braues Seigneurs auoient-ils promis de les faire receuoir à l'Ordre des Cheualiers du S. Esprit, aufquels ils ont manqué? Entre



autres il en auoient donné sa foy à vn Prelat des plus qualifiez du Royaume, duquel Luyne a pris vn Horloge de prix & de rare artifice, y ayant vn Concou qui châte à toutes les heures, cependant il ne luy a point tenu parole. Ont-ils plus gardé la foy enuers Madame la Vidame, de laquelle Cadnet a espoufé la fille, à laquelle il auoit promis la charge de Dame d'honneur de la Royne? N'ont-ils pas pippé aussi le Sieur de Chastillon, auquel i's auoient promis l'estat de Marechal de France, & au Sieur de la Boissiere vn Gouuernement de Picardie, au cas que tous deux consentissent au mariage de Mademoiselle de Piquigny? Et apres que Cadnet l'a espousee, ils ont tenu aussi peu parole ausdits Sieurs, qu'à ladite Dame. Que s'ils affrontent aussi ceux desquels ils s'allient, que peuuent esperer d'eux les estrangers? Vrayement le Prouerbe Prouençal est bien veritable en eux, qui dit

*In gens dau Comtat*

*Non ay ny fé, ny loyautat.*

Les Prouençaux ayants remarqué que les Comradins du territoire d'Auignon pays de Luynes, sont les plus desloyalles gents de tout le monde, ne s'estoient-ils point engagé au Duc de Fronfac de luy faire espouser l'heritiere de Luxembourg, pour le faire departir de l'heritiere de Piquigny, cependant ils luy ont manqué? Combien ont-ils promis de chose au Vidame de Chartres, dont ils n'ont rien tenu? N'ont-ils pas desbauché le Clec d'auprés du Sieur de Pysieux, auquel ils auoient promis la surintendance de la maison de Luyne, afin de tirer par là, ce que le-



dit le Clerc ſçauoit des ſecrets de ſon maiftre, & puis apres ils luy ont manqué de parole comme aux autres Qui vouldra plus ſe fier plus en eux; puis que l'on voit qu'au meſme temps qu'ils telmoignent deſirer vn accommodement par l'enuoy de Meſſieurs le Grand, Montbazon, Preſident Ianin & l'Archeueſque de Sens, vers la Roynemere, ils portent au meſme instant les affaires à l'aigreur du coſté de Normandie?

Voila, ce diſent-ils, les humeurs des Luynes: Que ſi vn deſir curieux nous pouſſe de les cognoiſtre plus particulieremēt on trouuera qu'ils ne ſont ny bons Royaux, ny bons Bourbons, ny bons Eſpagnols, ny bons Sauoyards, ny bons Lorrains, ny bōs Catholiques, ny bōs Huguenots. Si voulez ſçauoir la raiſon pourquoy? C'eſt qu'ils n'ont deſſeins que d'eſtre bons pour eux-meſmes. Et pour y paruenir, ils appliquēt toute ſorte de puiffance pour fortifier la leur, ſe ſeruāt du credit de tous les Princes ſelō les occurrences de leurs affaires, tantōſt faiſant ſemblant de fauoriſer les vns, tantōſt les autres: Vne autrefois d'auoir quelque inclination pour le party Catholique, & tātōſt pour celuy des Huguenots, endormans ainſi, & pippans tous ceux qui prennēt croyāce en leurs paroles, bien qu'ils n'ayent en tout cela intention aucune de faire pour perſonne, ſinō entāt que le principal profit leur en demeure, afin de regner touſiours. Ainſi ſe ſont-ils ſeruy du Pape, du Duc de Sauoye, des Archiducs de Flādre, de Madame la Comteſſe de Soiſſons, de Monsieur de Mayenne, de Monsieur de Longueuille, des Peres Ieſuites, des Deputez des Huguenots, & aujourd'huy de Mōſieur le Prin-

ce, & du Due de Guise, qui se trouueront tropéz  
 mocquez aussi bien que les autres, d'autât qu'ils  
 ne commenceront pas par eux à bien faire, puis  
 qu'on voit qu'ils manquent tous les iours au ser-  
 uice du Roy, leur bien-facteur, duquel ils deschi-  
 rent l'Estat, *pour du desbris en dresser des trappees à la*  
*grandeur de leur fortune.* Que si on veut ietter les  
 yeux sur tout ce qu'ils ont fait depuis 3. ans, il se  
 iustificera qu'ils n'ont pensé à faire aucune chose  
 pour le bien du Roy ny du public. Les plus bel-  
 les actions qu'ils ont fait n'ayans esté qu'à pren-  
 dre de tous costez, achepter des Gouvernemens  
 & des charges, faire fortifier leurs Citadelles: en  
 vn mot *enrichir leur maison. & appauury l'Estat.* Estās  
 les seuls autheurs de tous les orages qui se cou-  
 uent dans la France. Car il n'y a perlonne si des-  
 pourueu de sens qui ne sçachent que les difficul-  
 tez qui se trouuent aujourd'huy en l'accommo-  
 dement entre le Roy & la Roynie mere, *naissent*  
*à cause des interests particuliers de Luyne, & nō de ceux*  
*de leurs M.* le Roy & sa mere estans de trop bons  
 naturels pour se rédre des deseruices les vns aux  
 autres. Le souhait de la Roynie est d'estre auprès  
 du Roy: Ces noms de Mere & de Fils ne peuuent  
 souffrir diuision. Le bien des affaires du Roy &  
 du public requiert cela. Au contraire, *le bien des*  
*affaires de Luyne, & de ses parents est que leurs Maistez*  
*soient diuisees.* Et voila la source du mal. Le Roy  
 ne peut esperer que toute consolation par le re-  
 tour de la Roynie mere: *Luyne au rebours croit que*  
*ce retour luy est nuisible.* L'absence de la Roynie met  
 en lustre & affermit la grandeur de Luyne: là où  
 sa presence amoindriroit l'auctorité qu'il vsurpe  
 dans le Louure. *Ainsi l'interest de Luy est tous*

*different de celuy du Roy: Et par consequent Luyne fera tousiours tous ses efforts pour continuer à mettre S. M. en defiance de sa mere, ainsi qu'il a fait iusques à present, à fin de se conseruer seul cet abso. u pouuoir qu'il s'attribuë dans les affaires du Roy. Et partant c'est vn grandissime malheur, disent-ils, qu'il faille que les artifices d'un seruiteur cauteleux, preualent l'innocence d'une mere affligee, & que le Roy & son Estat patisse pour cõplaire à l'ambition desreglée de quelques fauoris qui veulent regner aux despens de tout le monde.*

*Ils se plaignent qu'on enuie leur fortune: Non on ne l'enuie pas: mais ont est seulement mary de ce qu'ils n'en vsent bien, & qu'apres auoir souffert les insolèces du Marechal d'Ancre, on voye Luyne succeder en sa place pour faire encore pis. Car il semble, disent ils, qu'il ait entrepris de l'encherir par dessus, ayant succedé à ses charges, à ses biens, & à tous ses desseins. Il se trouuera encores des lettres escriptes de la main de Luyne, par lesquelles il se moquoit de ce que le Marechal d'Ancre auoit eu ce grade par faueur, & non par vertu. Que dira-il si on luy demande par quelle voye Cadnet est paruenue à ce tiltre? Il y a aussi plusieurs telmoins qui ont oüy Luine se plaindre de ce que la Royne-mere ne faisoit acheuer l'ornement de l'effigie du Roy qui est sur le pont neuf. Et luy y a-il fait travailler dauantage, depuis qu'il dispose des Finances de l'Estat? Non, il n'a point fait, ny fera mieux que Conchine.*

*Le Marechal d'Ancre vouloit disposer d'une partie de ce qui se passoit au Cõseil? Luyne veult disposer de tout. Tous les bons François estoient contre le Marechal d'Ancre: ils sont aussi con-*



tre Luine. Monsieur de Mayenne, & les autres Princes s'estoient retirez de la Cour, à cause de l'insolence du Mareſchal d'Ancre: Le meſme fōt ils pour celle de Luine. On taxoit Conchine d'vſer de fortilege, vn des gens de Luine eſt priſonnier dās la Baſtille, qui l'accuſe de meſme crime. Le Mareſchal d'Ancre abuſoit de l'autorité de la Royne mere: Luine abuſe de celle du Roy ſō Fils. Le Mareſchal d'Ancre auoit la Citadelle d'Amiens: Luine l'a auſſi. Le Mareſchal d'Ancre ne l'a ſceu faire acheuer: Luine employe ſans neceſſité les plus clairs deniers du Royaume pour ceſte fortereſſe, y ayant deux mil hommes qui y trauaillent tous les iours: Le Mareſchal d'Ancre eſtoit Lieutenant en Picardie Luine en eſt Gouverneur en chef. Le Mareſchal d'Ancre ny tenoit qu'vne place: Luine tient toute la Prouince. Le Mareſchal d'Ancre vouloit r'aualler l'autorité de quelques Grands du Royaume: Luine les veut tenir tous au deſſous de luy. Le Mareſchal d'Ancre faiſoit du bien à quelques-vns: Luine n'en fait à perſonne qu'à ſes parents. Le Mareſchal d'Ancre tenoit ce qu'il auoit promis: Luine ne tient rien de tout ce qu'il promet. Le Mareſchal d'Ancre vouloit faire eſpouſer l'heritiere de Piquigny à ſon fils: Luine l'a fait eſpouſer à ſon frere. Cōchine eſtoit eſtranger Florentin: Luine eſt eſtranger Comtadin. Pour concluſion veritable le Mareſchal d'Ancre n'auoit rien de bon en l'ame: n'auſſi a de Luine, ny ſes freres, qui meritent vn pareil traictement qu'à receu le Mareſchal d'Ancre, puis qu'ils ſont heritiers de ſes biens, & imitateurs de ſes deſſeins.

F I N.